

# ما عَظَمَ وخفى فى مُحاولات نبش قبر المصطفى

أحمد حسنى



## المحاولة الأولى

=====

سيبوا الى في ايديكوا وتعالوا شوفوا الصورة التي لم يشاهدها الا ٠,٠١ ٪ من المسلمين حول العالم ولله الحمد..

٠,٠١ ٪ .. يعنى مليون مسلم تقريبا..

يا ترى كام واحد فيهم صدق انها فعلا قبر الرسول عليه الصلاة والسلام؟

كام واحد فيهم لم يمنعه حبه لمارك انه يعملها شير وهو مصدق؟

ماذا بينهم وبين الله حتى يشوفوا الصورة الى ملهاش اى ثلاثين لزمه دى؟؟

=====

قصتنا مع القبور قديمة.. ومع الهيد اكثر قدما.. احنا عندنا هبادين عمرهم من عمر الكوكب.. لا.. كوكب ايه.. احنا عندنا هيد وهبادين وجدوا قبل المجرة نفسها.. يعنى الشمس اتخلقت وظهر بعدها الهيد وبعدين حصل الانفجار العظيم "ده لو كان صحيح يعنى".

لم يبدأ الهيد في تصور شكل قبر الرسول عليه الصلاة والسلام ولن ينتهى بقبور الاولياء الى مالية العالم الاسلامى شرقا وغربا واغلبها فستك.. رأس الحسين مثلا لها ٨ مقامات مؤكده بين مصر وسوريا والعراق.. ال البيت مدفونين في كربلاء ومصر في نفس ذات الوقت.. وكيع استاذ الامام الشافعى مدفون جيب تلميذه في القاهرة رغم انه مجاش مصر اساسا.. في عمان (الأردن) هتلاقى قبر سيدنا شعيب وسيدنا موسى وسيدنا هاورن ويوشع بن نون وسيدنا ايوب وانبياء تانية كتير اوى مفيش دليل تاريخى او علمى او دينى واحد يوحد ربنا على صحة وجود اجسادهم الشريفة في الأماكن دى.

بس قبر الحبيب وضعه مختلف..

ده مكان حديث نسبيا.. ١٤٠٠ سنة مش كتير يعنى علشان نكون متأكدين ان ده المكان الى اندفن فيه.. القصة هنا مش احنا متأكدين من دفنة في بيت السيدة عائشة الموجود في نفس المكان الحالى وللا لأ.. قصتنا هنا هو المقام والتركيبه الى فوق القبر..

التركيبه التي لم يشاهدها الا ٠,٠١ ٪ من المسلمين..

معلش بقى.. اشمعنى يعنى ال ٠,٠١ ٪ دول؟؟ عندهم واسطة يعنى؟؟

ليهم قرايب امناء شرطة مثلا؟؟

بص كده معايا على شكل التركيبه..

مش ده الشكل العثمانى لتراكيب القبور؟؟

مش ده بالظبط شكل قبر ارطغرل وعثمان الأول ومحمد الفاتح وسليمان القانونى وباقي سلاطين بنى عثمان؟؟

هل في تراكيب قبور بالشكل ده قبل العثمانيين؟؟

طيب هو مين الى جه الأول؟؟ الرسول عليه الصلاة والسلام الى توفى في القرن السابع الميلادى وللا العثمانيين الى ظهوروا في القرن الرابع عشر الميلادى؟

هل ده شكل عمامة الرسول؟؟

متمشيش معاك انها عمة جلال الدين الرومى مثلا؟؟

طيب لو ده قبر النبى.. فين قبر الصحابة الكرام.. الصديق والفاروق رضوان الله عليهم؟؟

الحاج الى الف الصورة دى.. ماذا بينه وبين الله علشان يكون بكل هذا الكم من الغباء الى يخليه ياخذ صورة قبر جلال الدين الرومى الموجود في قونيا في تركيا والمفتوح للزيارة حاليا وينسبه للرسول عليه الصلاة والسلام؟

كل ده من اجل حفنة لايكات؟؟

وماذا عن السيئات؟؟

هيقولك ما هو ممكن يكون الرسول اندفن في قبر عادى وبعد كده العثمانيين بنوا التركيبة دى كنوع من انواع التجديد للقبر الشريف زيه زى المسجد النبوى نفسه.. قبة المسجد الخضراء مثلا مكانتش خضراء يوم ما بناها المنصور قلاوون من الخشب وبعدين عدلها وصلحها ولاده واحفاده لحد ما السلطان قايتباى شالها خالص وبنائها من الاول بالفن والهندسة من الجبس الأبيض.. بعد كده اندهنت بالأزرق لحد ما ظهر فيها تشققات في زمن السلطان عبد الحميد الثانى الى جددها ورممها ودهنها باللون الاخضر الجميل الموجود حاليا.. يا اخى المسجد نفسه مفيهوش مأذنة شبة الثانية.. أجملهم بناها السلطان قايتباى وأشهرهم بناها السلطان عبد المجيد.. لو دخلت جوا المسجد هتلاقى اكثر من منبر أجملهم هدية من السلطان مراد الثالث.. الحجرة النبوية الشريفة نفسها عليها لوحة تأسيسية بتقول ان البناء الموجود حاليا بناه السلطان قايتباى.. بينما واجهة الحجرة عليها لوحة فضة هدية من السلطان احمد الثالث.. كل سلطان حكم بلاد المسلمين كان ببسابق السلاطين الثانىين في وضع بصماته على الحرم الشريف.. الكلام ده ايام السلاطين العظام قبل ما النخل يطرح علمانية في تركيا وبلج في مصر.. يعنى وارد تكون التركيبة الى في الصورة دى من اعمال سلطان من العثمانيين حيث انها اقرب لتراكيب قبورهم فعلا.

بس لا.. خلينى اقولك ان الصورة رقم (١) دى لا تتجاوزوا مسألة الهبد يا افندم..

هبد صرف زيه زى اى هبد ملوش اى ثلاثين لزمه في الحياة.. هبد زيه زى الهبد بتاع مكان قبر عمرو بن العاص وان الذئب بتشوف العفاريت وان في غابة في المانيا اتشكل شجرها على شكل راية التوحيد وشجرة تانية معرفش فين اتشكلت على شكل راجل راكم في اتجاه القبلة.. ده طبعا غير الهبد بتاع الحرم المكى الى باين منور من سطح القمر واسم ربنا الى بيظهر دايم في الطماطم وعلى قشر البيض "البيض تحديدا مش البطاطس" وسماع صوت الاذان على القمر وان الصيام مفيد طبيا والاف مؤلفة غير منتهية من الهبدات الى الفها أشخاص لهم اهداف الله اعلم بيها لكنها مش في صالح الدين اكيد حتى لو سيطرت على قلوب الناس الطيبة.

وعلشان مبيقاش كلام مرسل.. خلينا نقرب شوية من الحجرة الشريفة نفسها..

مفيش حد فينا مش عارف تفاصيل اليوم الحزين الى ثقلت فيه الرأس الشريفة على صدر الزوجة الملتاعة في مصاب لا يضاهية اى مصاب في التاريخ قبل ما تهبط اليد الشريفة بلا حراك معلنه خروج الروح الطاهرة الى مستقرها الابدى في جوار الرحمن وسكون الجسد الذى لم يهدأ يوما في سبيل الدعوة الى عبادة من يستحق العبادة في هذا الكون.

اختار الرسول انه يدفن في بيت عائشة.. الزوجة الحبيبة بنت الصديق الوفي.. دعا الرسول قبل وفاته قائلا "اللهم لا تجعل قبرى وثنا يعبد" والحديث محقق وقوى السند وموجود في اكثر من مصدر عن ابو هريرة والامام احمد وغيرهم.

وعارفين كمان ان الصديق رضى الله عنه لما مات اندفن جوار صحبة الخير في الدنيا وفي الآخرة.. اندفن بحيث ان رأسه كانت عند مستوى صدر الجسد الشريف.. وساعتها مكانش في اى مشاكل للسيدة عائشة في الدخول والخروج عليهم.. ابوها وجوزها.. المشكلة بدأت لما مات سيدنا الفاروق واندفن جنب اصحابه.. بقى هنا في رجل غريب عن السيدة عائشة.. ميت اه.. بس معلى مينفعش تدخل على قبره كده.. دى حاجه كده اسمها الحياء.. بيتكلموا عنها الايام دى باعتبارها تاريخ يعنى.

ومين هيكون اكثر حياء من ام المؤمنين؟؟

قررت السيدة عائشة تفصل المقابر عن حجرتها.. ومن هنا بدأت فكرة عزل الغرفة الى فيها القبور الثلاثة..

طيب هو الجسد الشريف اندفن ازاى؟؟

لو رجعت للدرر السنية هتلاقى السيدة فاطمة قالت لأنس ابن مالك "يا أنس.. اطابت انفسكم ان تحثوا على رسول الله التراب؟"

يعنى قدرت يا انس ترمى التراب على جسد النبى؟؟

معرفش سيدنا أنس جاب منين قوة الاعصاب دى.. اذا كان سيدنا عمر بكل ما كان فيه صرخ في الناس وقال من قال ان محمدا قد مات ضربت عنقه.. الواحد دموعة بتنزل غصب عنه وهو بيتخيل الجسد الشريف مسجى بلا حراك.

ركز على كلمة "تحتوا" ..

يعنى ترموا.. تدفنوا.. تغطوا..

يعنى التراب اترعى من فوق لتحت.. الجسد الشريف اندفن تحت الارض.. وده الى حققه الدكتور فهمى احمد القزاز من ١٠ سنين تقريبا.. وزى ما هو واضح فى الصورة "التوضيحية التخيلية" رقم (٤).

وركز اوى على موضوع التوضيحية التخيلية ده لأن مفيش حد دخل لحد مكان الدفن علشان يوصف او يرسم.. وبالتالى الصورة رقم (٢) هى كمان هبى رغم ان مفيهاش قبه ولا تركيبة ولا مقام.. اقرب وصف لمكان دفن الرسول عليه الصلاة والسلام هتلاقية فى كتاب وفاء الوفا بأخبار دار المصطفى.. الى حطه نور الدين بن عبد الله السمهودى المتوفى سنة ٩١١ هـ.. السمهودى حضر احداث ترميم القبر سنة ٨٨١ هجرية ايام السلطان قايتباى لما لقوا ان الجدار الخماسى "المظلل باللون البنى فى الصور رقم (٣) تشقق وكشف ان الجدار الاول الى وراه "المظلل باللون البرتقالى فى نفس الصورة" مال ويكاد انه يسقط لولا انه بميله سند على الجدار الخماسى.

طيب ايه بقى قصة الجدران والرصاص المصبوب حوالين القبور زى ما هو ظاهر فى الصورة رقم (٤)؟

الكلام ده يلزمه نرجع بالزمن لورا..

لاحداث محاولات سرقة الجسد النبوى الشريف..

وامسك اعصابك معايا لأن الكلام ده جد مش هبى.. استعد لأن تخنقك العبرات حزناً أو شوقاً.. كمان نضف قلبك كويس لأن فى نفسنة جامده جدا هتحصل على واحد من السلاطين..

1



هاذا مالم يشاهده سوى 1.0%  
هذا قبر أشرف الخلق محمد (ص)



هـذا هـو مالم يشاهده سوى 0.1% من المسلمين حول العالم  
هذا هو قبر أشرف الخلق محمد (صلى الله عليه وسلم) من الداخل





انكسار

August 16 at 5:12 AM · 🌐

...

قبر الرسول  
تجاهلها ان استطعت ❤️

635 Comments 189 Shares

Comment Share

Most Relevant ▾

Badry

اللهم صل وسلم وبارك على نبي  
به العقد و تنفج به الكرب و تُن  
الحوائج و تُنال به الرغائب و حس  
الخواتيم و يُستسقي الغمام بو  
الكريم و علي آله وصحبه أجمع


اللهم صل على سيدنا محمد و  
سيدنا محمد كما صليت على ر  
ابراهيم و علي آل سيد...  
More

ily · 3w




1

3



## القبر النبوي الشريف

4



١. اللحد الذي يضم الجسد الطاهر الشريف للنبي ﷺ

٢. قبر النبي محمد رسول الله ﷺ فوقه بطحاء صفراء بارتفاع ١٥ سم

٣. رصاص مصبوب حول القبر الشريف في عهد السلطان محمود نور الدين زنكي سنة ٥٥٧ هجرية

٤. سقف الحجرة الطاهرة من جريد النخيل من عهد صاحبها عليه الصلاة والسلام ما عدا اصلاح السقف في عهد عمر رضي الله عنه ١٧ هـ

٥. قبة فوق القبر الطاهرة أنشأها السلطان قايتباي في عمارته سنة ٨٨٨ هجرية

٦. جدار حجرة السيدة عائشة رضي الله عنها بني في زمن النبي ﷺ وتم تجديد الجدار الشرقي في عمارة الوليد ٨٨ - ٩١ هجرية

٧. جدار عمر بن عبد العزيز رحمه الله حول الحجرة الشريفه خماسي الاضلاع

٨. اعمدة وجدار قايتباي رحمه الله حاملة الستائر على القبر الشريف سنة ٨٨٨ هـ

٩. جدار المقصورة الخارجي حامل القباب

١٠. القبة الزرقاء أنشأها قايتباي عام ٨٨٨ هـ

١١. القبة الخضراء انشئت عام ١٢٢٨ هـ في عهد السلطان

محمود خان العثماني فوق القبة الزرقاء

١٢. كوة مفتوحة جهة الجنوب مطلة على الساحة الجنوبية ٦٠×٣٠ سم متجهة الى القبر الشريف

١٣. هلال من النحاس مطلي بماء الذهب اعلى القبة الخضراء

١٤. قبر أبي بكر الصديق رضي الله عنه

١٥. قبر عمر بن الخطاب رضي الله عنه

١٦. هذا الجزء من القبة الزرقاء ازيل بعد حدوث بعض الشروخ بها وانشئت فوقها القبة الخضراء

مصسوب قاع القبر الشريف

## المحاولة الثانية

=====

هل في حد ممكن يفكر في سرقة جسد الرسول؟؟

بالأنانية المطلقة والعاطفة.. اه طبعاً.. المنطق الفاسد المبرر للفعل ده يقول ان مفيش شرف يساوى شرف جوار الرسول حتى لو اضطرينا الى سرقة الجسد نفسه.. ليه يعنى دولة معينة تحتكر وجوده؟؟ ما كلنا مسلمين.. يبقى لكل منا في حبه وقربه وجواره نصيب.

ده المنطق بتاع مثنى وثلاث ورباع يبقوا تسعة.. بالتدين الشكلي اه طبعاً نحب قربه وجواره.. لكن بالايمان الحقيقي والعقل هنعرف ان الشرف الاكبر من جوار الجسد "صورياً زى ما الناس هتموت عليه كده" هو شرف الالتزام بتعاليم صاحب الجسد.. هو عايزك قريب منه فعلاً لا قولاً.. عايز قلبك قريب منه حتى لو ابعدت الأجساد المسافات وفرق بينهم هادم اللذات.. هو عايزك تحبه من غير ما تزعله لأن هو شخصياً أوصى بدفنه حيث توفاه الله والتعامل مع قبره على انه قبر عادى جداً.. لا يعبد ولا يميز ولا تقام حوالياه اى حاجه من الحاجات الى انت عارفها.. وبما انه رسول الأمة.. يبقى وصيته امر واجب النفاذ.

بس دى مكانتش وجهة نظر الحاكم بأمر الله.. واحنا مش تايهين عن الحاكم بأمر الله طبعاً..

راجل دماغه الماظات ادعى الألوهية وكانت سيرته غريبه فتحت الباب لخيلات ناس كثير علشان تزود في الحكايات وتقول فيه ما قيل عن السيسى ونظامه في الظلم والجبروت والدموية وغرابة الشخصية.. راجل قال عنه شمس الدين الذهبي في سير اعلام النبلاء "كان شيطانا مريداً جباراً عنيدا ، كثير التلون ، سفاكاً للدماء ، خبيث النحلة ، عظيم المكر ، له شأن عجيب ، ونبأ غريب ، كان فرعون زمانه ، أمر بسب الصحابة رضي الله عنهم ، ويكتابة ذلك على أبواب المساجد والشوارع " ومعرفش الحقيقة هو موجود في سير اعلام النبلاء ليه.. لما ده نبلاء.. امال الملاعين يبقوا ايه؟؟

الناس معاها حق اكيد في سيرة الحاكم بأمر الله.. لما راجل يقرر انه ينقل الجسد الشريف من مكانة الى مكان اخر يبقى اكيد راجل مخبول.

وبعدين جسد شريف ايه الى انت مهتم بيه وانت نازل في اصحابه وزوجته شتيمة ليل ونهار!!!

بس اهو.. الجنون ملوش حدود.. في اوائل القرن الخامس الهجرى استمع الحاكم بأمر الله لنصيحة الزنادقة الى نفخوا في ودنه بفكره تبناها ابليس شخصياً.. احنا لو نقلنا جسد النبى الى مصر.. يبقى الناس هتشد الرحال ليها.. يعنى السياحة هتنتعش والاقتصاد هيزدهر وتبقى القاهرة ملء السمع والبصر ومعاها حاكمها طبعاً.. كمان وجود جسد النبى في مصر هيبقى بركة ويمنع عنها البلاوى.. زى الشدة المستنصرية الى يا دوب ملحقناش نفوق منها.. انت بس تجهز مكان يليق ورجالتك الى تنفذ مفيش اكر منكم.

وفي نصيحة الحاشية والبطانة هنا ما يسترعى الانتباه.. لما تقرأ التاريخ بالتفصيل مش هتلاقى وجود لما يسمى بالحاكم الكويس بس الى حوالياه هما الى وحشين.. الطيور على اشكالها تقع.. الحاكم الكويس هيفتار مساعدين كويسين يعينوه ويقوموه لو لزم الأمر.. بينما الحاكم الظالم الطاغية المتجبر مش هيجب يسمع الا صوته او صداه ولا هيبقى عايز يشوف الا مظاهر تقديسه.. فبالنالى الحاشية الصالحة والبطانة المخلصه مش هيبقى لها مكان في بلاطه.. بالرجوع الى تاريخ العالم هتلاقى دايم اهل العلم والاخلاص في النصيحة في زمن الجبابرة مكانهم معتقل العقرب او سجن طره.

مكديش الحاكم بأمر الله خبر.. بعث امير مكة ابو الفتوح الحسن بن جعفر لأهل المدينة فيما يشبه المفاوضات.. ابو الفتوح قعد مع الناس هناك وقالهم انا جايلكوا في كيت وكيت.. هاجت الناس ضده وكادوا ان يقتلوه وممنعهمش الا انه كان في الحكم وله قوة تحمية.. بينما انفرد في القعدة دى رجل اسمه الزلباني قرأ من سورة التوبة "أَلَا تُقَاتِلُونَ قَوْمًا نَكَثُوا أَيْمَانَهُمْ وَهَمُّوا بِإِخْرَاجِ الرَّسُولِ وَهُمْ بَدَءُوكُمْ أَوَّلَ مَرَّةٍ أَنْتُمْ خَشَوْهُمْ فَلِلَّهِ أَحَقُّ أَنْ تَخْشَوْهُ إِنْ كُنْتُمْ مُؤْمِنِينَ" .. وكأنه بيستعين بالقرآن الى مش بينكره الا من انكر الدين كله في دفع الضرر والافكار المجنونة عن الجسد الشريف.

لما سمع ابو الفتوح الآيات حس بضيق في صدره بالرغم من انه كان موالى للفاطميين واقام خطبة الجمعة لهم قبل كده.. قرر انه هيتراجع حتى وان ازهق الحاكم بأمر الله روحه.. صحوة ضمير رجعت الباغي عن بغية.. او ربما هو تأثير الآيات.. او الأكيد انه تدبير الله عزوجل.. كمان ربنا كان رحيم بيه لما بعث عليه رياح عنيفة زلزلت الأرض من تحته وشالت كل حاجه من مكانها ورزعتها في الأرض.. حتى ان الخيل والدواب بقت تتشال في الهواء وتتهبذ على الأرض تنزل ميتة.. حاجه مرعبه فكرت الجميع بريح قوم عاد.. ابو الفتوح بن جعفر اعتبرها علامة على



مصيره الاسود لوكمل في الفعل الشنيع.. تقبل الرسالة ورجع للحاكم يعتذر له عن عدم اتمام الفعل زى ما حكى السمهودى في وفاء الوفا نقلا عن ابن النجار في كتابة تاريخ بغداد.

حتى وان لم ينبرى اهل المدينة للدفاع عن جسد سيد الخلق.. فكرك ان ربنا كان هيسيب المصيبة دى تحصل؟؟

لا افتي بما لا اعلم.. ولكنى اعتقد انه لا.. مش علشان خاطر اهل المدينة وحبهم للحبيب الى شرف مدينتهم لما رضوا بالتنازل عن حقهم في مغانم الغزوات الى خرجوا فيها مع الرسول في مقابل العودة بالرسول نفسه وحياته وموته وسطهم.. انما كرامة لصاحب الجسد ووصيته.

يهبط الحاكم بأمر الله على كده ويركز مع مصر واهلها وللا لسه في تانى؟

لو كان سكت يبقى انسان عادى اخطأ وتراجع عن خطؤه "رغم فداحة الجرم" وانتهينا على كده.. لو عمل كده ميقاش الحاكم بأمر الله.. ده واحد كان شايف نفسه مبيغلطش.. هو كان ببني مصر بتاعته وعائزها "كده" يبقى هيعمل اى حاجه تخلى مصر بتاعته "كده".. ببني كبارى بقى.. يفرض ضرائب.. يسرق الجسد الشريف.. مش مهم.. هو هيعمل اى حاجه علشان مصر بتاعته هو.. وبكره تشوفوا مصر.

المحاولة الثانية ذكرها السمهودى برضه في وفاء الوفا نقلا عن كتاب تأسي أهل الإيمان فيما جرى على مدينة القيروان لابن سعدون القيرواني الى حكى على لسان واحد اسمه ابن عذرة حضر واقعة محاولة سرقة الجسد الثانية وقال فيها "ثم أرسل الحاكم بأمر الله إلى مدينة الرسول صلى الله عليه وسلم من ينبش قبر النبي صلى الله عليه وسلم ، فدخل الذي أراد نبشه دارا بقرب المسجد ، وحفر تحت الأرض ليصل إلى قبر النبي صلى الله عليه وسلم ، فرأوا أنوارا ، وسمع صائح : إن نبيكم ينبش ، ففتش الناس ، فوجدوهم ، وقتلوهم".

الحاكم بأمر الله قالك المفاوضات مش نافعة.. احنا نلجأ للحيلة.. بس يظهر انه بعث ناس شبه كامل الوزير كده.. لما جم يحفروا نفق من بيت قريب من القبر الشريف استعانوا بالمصاييح علشان ينوروا النفق الى يحفروه.. الناس من بره شافت النور وفهموا الموقف.. وكان ما كان.. اهل المدينة قاموا عليهم فرتكوهم وهما كده كانوا بيهم رحماء جدا.

لم تذكر لنا كتب التاريخ امتى بالظبط كانت الواقعة دى.. هل كانت قبل الواقعة الاولى بتاعة ابو الفتوح وللا بعدها.. كان بينهم اد ايه وقت.. ايه رد فعل الناس على الحاكم بأمر الله نفسه.. للأسف مفيش تفاصيل.. هي كده زى ما جت في كتاب السمهودى.. اغلب الظن انها حصلت بعد المحاولة الاولى لو اعتبرنا ان السمهودى رتب الاحداث في وفاء الوفا تاريخيا.

طيب.. خلصنا من القرن الخامس الهجرى ومحاولاته.. القرن السادس الهجرى بقى.. قرن صلاح الدين الأيوبي والحملات الصليبية.. هل كان في محاولات لنبش قبر النبي؟؟

بكره نكمل

اه.. قبل ما نقفل.. كتاب وفاء الوفا ده عظيم جدا يا جدعان لأى حد حابب يستزيد عن المدينة المنورة واثارها.

## المحاولة الثالثة

=====

بعد المحاولتين الخايبين بتوع الحاكم بأمر الله لسرقة الجسد النبوي الشريف وبعد ما شفنا المعجزة اللى حصلت ومنعت السرقة.. هل اتعظ المجرمين بعدها وعرفوا ان ساكن المكان محمى برب الكون قبل ما يكون محمى بمجموعة من البشر مهما كانت قوتهم؟  
هنشوف..

المحاولة الثالثة حكى عنها جمال الدين عبد الرحيم بن الحسن بن علي الأسنوي المتوفى سنة ٧٧٢ هـ فى رسالة اسمها " نصيحة أولي الألباب فى منع استخدام النصارى".. وحكى عنها كمان رئيس المؤذنين فى الحرم النبوي الشريف الحافظ جمال الدين عبد الله بن محمد بن أحمد المطري المتوفى سنة ٧٦٥ هـ.. الراجل ده كان مؤرخ له كتب اشهرها "الإعلام فيمن دخل المدينة من الأعلام" قال فيه انه سمع قصة محاولة نبش قبر النبي من الفقيه علم الدين يعقوب بن أبي بكر اللى هو بدوره سمعها من من أكابر الناس اللى ادركت الحدث نفسه.  
ليه المقدمة دى؟؟

بس علشان نوضح سند القصة.. مين نقل عن مين ومين قال ايه ومين كان حاضر او لا..

طيب الحدث نفسه كان ايه وامتى بقى؟

هنرجع لسنة ٥٥٧ هـ..

احنا دلوقتى فى زمن الملك العادل أبو القاسم نور الدين محمود بن عماد الدين زنكي رحمة الله عليه.. الراجل ده لو فتحنا عنه فى الكلام مش هنخلص الا بعد بكرة.. الحديث هنا مش عن سيرته العطرة.. انما عن واقعة محاولة سرقة الجسد النبوي الشريف اللى حصلت فى ايامه.

خلاص.. الدولة الفاطمية بتنتهى بكل خرافاتها وتطاولها على الصحابة وفشلها الذريع فى التصدى للحمالات الصليبية.. المستنجد بالله وقتها كان شاعر اشتهر عنه العدل والحكمة صحيح.. بس فى المجلد كان ضعيف مقدرش يقف قصاد هجمات الصليبيين المتكررة على مدن الشام.. حاجه غلب.. كل كام سنة حملة من اوروبا وجيوش وحروب وملوك تيجى وملوك تروح تحت راية الصليب بإسم الدين.. حروب ارتكب فيها المعتدى كل ما نهى عنه اى دين سماوى او غير سماوى قريب او بعيد عن المسيحية.. وقت الاحداث دى نور الدين زنكي كان عنده ٤٦ سنة.. احنا دلوقتى فى عز زمن الحملة الصليبية الأولى.. نور الدين كان بيكمل جهاد ابوه عماد الدين زنكي فى حرب الصليبيين.. رجل فى قمة كل حاجه ممكن يبقى لياها قمة.. صحة ونضوج وعقل وملك وقوة وكل شيء من سوء حظ المخططين للفعلة المهيبة دى.

نور الدين كان متعود على التهجد.. فى احدى الايام بعد ما خلص صلواته دخل ينام.. شاف فى المنام سيدنا النبي عليه الصلاة والسلام وهو بيشاور على رجلين اشقرين وبيقوله "انقذنى من هذين".. صحى نور الدين من النوم مخضوض وجسمه بيصب عرق.. اتوضا وصلى وبعدين حاول ينام.. برضه شاف نفس المنام.. قام اتوضا وصلى وحاول ينام تالت.. نفس المنام بيتكرر هو هو.. مبدهاش بقى.. النبي بيستغيث.. يبقى اكيد النبي فى خطر.. معادش فيها نوم.. بعث فى الحال يستدعى وزيره جمال الدين الموصلى وحكاه اللى حصل.. الوزير مفكرش كثير وقاله "وما قعودك؟ اخرج الان الى المدينة النبوية واكتم ما رأيت".

الفرق بين وزير يشور على مولاة بالجهاد ووزير يشور على مولاة بسرقة الجسد الشريف هو نفسه الفرق بين نور الدين زنكي والحاكم بأمر الله.. الموقف ده هو التجسيد الواقعى لكلام سيدنا النبي لما قال "المرء على دين خليله".

شد نور الدين الرجال الى المدينة ومعاه ٢٠ راجل.. الحجة كانت زيارة المقام الشريف وتوزيع الصدقات.. دى حاجه كان معتاد عليها السلاطين "الكويسين" ايامها.. اجتمع نور الدين بالناس فى المسجد النبوى وطلب منهم يسجلوا اسماء اهل المدينة فى كشوف علشان يوزع عليهم الصدقات.. الناس حضرت تال من عطف السلطان.. نور الدين بيتفحص فى الوجوه.. لسه مش لاقى الاثنين اللى شافهم فى المنام.. طول اليوم على الحال ده لما الراجل اصابته الحيرة.. خلصت الناس ولسه برضه ملقاش المراد.. طلب من الناس انها تراجع الكشوف تانى.. الناس تراجع وتقول مفيش يا مولانا.. يا اخوانا الله يهديكوا راجعوا كويس.. قالوله مفيش حد فاضل الا رجلين وصلوا المدينة من اسبوعين جاينين من المغرب.. بس سيبك منهم.. دول اساسا معاهم فلوس كثير وبيوزعوا على الناس الصدقات ليل ونهار.

سأل السلطان الناس عن سيرتهم واحوالهم واخلاقهم.. وللأسف الاجابة كانت مخيبة لتوقعاته.. الناس قالت انهم على درجة كبيرة من الصلاح.. بيصلوا كل الفروض في المسجد وطول الليل بيصلوا القيام والتهجد.. بالنهار صايمين بيوزعوا الصدقات في البقيع وقباء واخر اليوم عزله وقرآن وصلاة..

الله.. ايه دى بقى؟؟

طيب شكلهم ايه؟؟ قالوله شقر وفيهم من صفات الافرنج.. انشرح صدر نور الدين.. هما دول اكيد.. قام السلطان فى صحبة الناس لزيارة بيت المذكورين.. اول ما شافهم الله اعلم مسك اعصابه ازاي لانهم كانوا هما بالظبط الى شافهم فى منامه.. كتم نور الدين مشاعره فى ثبات انفعالي يتدرس لحد يوم القيامة وبدأ يتكلم معاهم.. وفى وسط الكلام خلاهم يصحبوه فى جولة فى البيت الى كانوا قاعدين فيه.. الكلام ظاهره الود وباطنة محاولات السلطان سبر اغوار العيال دى.. بس للأسف خلص بحث فى البيت كله وملقاش حاجه.. هو متأكد ان وراهم مصيبة بس مش لاقى دليل.. الراجل خلاص مخه ولع.

عين السلطان بتلف فى البيت كله زى الغريق الى بيدور على اى قشاية.. عينه ضربت فى الارض من الحيرة واليأس.. لمح حصيرة على الارض يبدو كده ان شكلها او وضعها احواله بشيء.. او ربما هو الهام ومكافأة من الله عزوجل.. رفع الحصيرة فلقوا تحتها سرداب محفور جديد فى اتجاه الحجرة النبوية الشريفة.. ولكن لم يكتمل الحفر.

يا ولاد ال...!!!

الناس الى كانت موجوده حصلها صدمة ورعب.. السلطان قبض عليهم هما الاثنين واوسعهم ضرب لحد ما اعترفوا انهم مش مسلمين بعثهم والى المغرب النصراني بترتيب من اسياده فى اوروبا علشان يسرقوا الجسد الشريف واداهم فى سبيل تحقيق الهدف الحقير فلوس بالهبل.

بقى هى الخطة كده؟؟

حملات عسكرية فى الشام وطعنات فى الظهر فى المدينة؟؟

بإعادة البحث تانى فى البيت فى ضوء اعتراف المجرمين لقوا عندهم شنت جلد زى الشنت المعتادة لاهل المغرب.. الشنت دى كانوا بيخبوا فيها التراب الى بيطلعوه من السرداب الى بيحفروه ويروحوا يرموه فى البقيع.. تبقى الناس شايفاهم يوزعوا البقيع ويعيطوا عند قبور الاحبة.. بينما فى الحقيقة هما بيداروا اثار جريمتهم.. الناس كانت بتدعيهم وهما بياخدوا منهم الصدقات.. بينما الفلوس دى كانت تمن تغفيل الناس علشان سرقة الجسد الشريف.. لك ان تتخيل شعور الناس فى المدينة وهما حاسين انهم مقدروش يحموا قبر النبي الكريم.. لك ان تتخيل شعورهم قصاد الراجل الى جاى من بعيد يكشف عن ثغرة رهيبة كانت هتسبب مصيبة لولا ستر رينا.. لك ان تتخيل اننا لما نقول ان السلطان امر بضرب رقابهم بس.. فهو كده كان رحيم بيهم جدا جدا.

بعد الحادثة دى امر نور الدين زنكى بحفر خندق كبير حوالين الحجرة الشريفة الى فيها قبور الحبيب وصحبه.. حفروا لحد ما المية طلعت.. بعدها ملوا الخندق رصاص ذائب.. الى هو الجزء الرمادى رقم (٢) فى الصورة الأولى المرفقة.. وبعد ما الرصاص نشف.. ردم عليه تانى بالتراب.. ورجع تانى على بلده بعد ما تأكد ان الجسد يرقد فى امان.

رحلة السلطان من الشام للمدينة خدت ١٦ يوم.. نفس الفترة الى فضل يحفر فيها المجرمين دول.. يوم وصوله كان يوم صيف عادى جدا.. ولكن فى نفس يوم وصوله.. الى هو يوم كشف المجرمين.. حصل رعد وبرق عظيم جدا فى سماء المدينة لدرجة ان الناس تخيلت ان ده صوت خلع الجبال.. معجزة تانية من معجزات الخالق عزوجل فى حماية رسوله الكريم.. الجسد الشريف مش هيحصله حاجه حتى لو اتفق سكان الكوكب كله على اذيته.. نور الدين زنكى ما هو الا سبب سببه المولى عزوجل علشان يحمى جسد الحبيب.. ويكافئ نور الدين زنكى على جهاده فى نفس الوقت.

انت بتقول يكافئ؟؟

اه طبعاً.. ومش اى مكافأة..

نور الدين زنكى.. ماذا بينه وبين الله علشان ينال الشرف العظيم ده؟؟

انت مدرك معناها ايه انك تشوف النبي فى المنام؟؟

مدرك يعنى ايه النبي يقولك احمينى.. وانت تقدر تحميه؟؟

لو نجح في الحماية.. يبقى ضمن لسيرته الخلود في الدنيا وضمن لنفسه الجنة في الآخرة بأذن الله..

لو فشل ومات وهو يحاول.. يبقى ضمن الجنة برضه بأذن الله لأنها موته كريمة في الدفاع عن الرسول عليه الصلاة والسلام..

يعني كده كسبانه وكده كسبانه..


تخيل يوم القيامة يطلع نور الدين زنكي زية زى مليارات البشر بيدور زى المجنون على سيدنا النبي ويطلب شفاعته زى كل الناس.. فيلاقى النبي فأكبره بالاسم ويقولو شكرا انك حميت جسدى..

نور الدين زنكي يتسمى راجل..

هـ.. راجل..


اصل في دلوقتي ناس على رؤوس بلاد المسلمين عندهم سلطة وفلوس وامكانيات اكثر من نور الدين زنكي ١٠ مرات على الاقل.. اتشتم نبههم من شوية فافريز لا يقارنوا ابدًا بمحاربين زمان الى هزمهم نور الدين اكثر من مرة.. ومع ذلك العالم دى مصرين يتعاملوا معاهم ويشترؤا منهم بضائع لها الف بديل وبديل تحت مسمى التحضر والاسلام الكيوت الى مبيكرهش حد وكده.

نور الدين زنكي كان راجل حقيقي.. غير كده.. يبقى بلحه.





## المقصورة النبوية الشريفة



هذا المخطط يعبر عن المسطحة الاقنطرية للمقصورة الشريفة التي تضم الحجرة الشريفة التي تضم القبور الطاهرة وبياقي الحجرات وبيت السيدة فاطمة رضي الله عنها

١٧. مكان التهجيد الذي كان يصلي فيه رسول الله ﷺ
١٨. خلف بيت السيدة فاطمة رضي الله عنها
١٩. مواجهة النبي رسول الله ﷺ
٢٠. مواجهة أخيرة رسول الله ﷺ أبي بكر
٢١. مكان الحجرات الطاهرة التي أزيلت في عهدة الوليد بن عبد الملك
٢٢. اسطوانة السور
٢٣. اسطوانة الوفود
٢٤. اسطوانة الحرس
٢٥. باب النوبة بالمواجهة الشريفة
٢٦. باب السيدة عائشة رضي الله عنها على الروضة الشريفة أو باب الوفود
٢٧. شباك اتجاه الرأس الشريف
٢٨. شباك اتجاه الاقدام الشريفة
٢٩. ابواب موجودة في المقصورة
٣٠. اسطوانة القبة الصغيرة على القبور الشريفة
٣١. اسطوانة القبة الخضراء
٣٢. باقي المقصورة الشريفة
٣٣. الجدار الخارجي للمقصورة الشريفة
٣٤. محرس علي رضي الله عنه على السيدة فاطمة الزهراء رضي الله عنها
٣٥. دار آل عمر بن الخطاب رضي الله عنه، دار الصغيرة، الرواط

١. قبر النبي محمد رسول الله ﷺ
٢. قبر الطفلة أبي بكر الصديق رضي الله عنه
٣. قبر أم المؤمنين عمر بن الخطاب رضي الله عنه
٤. المكان الذي أتى فيه النبي عيسى بن مريم عليه السلام، رواية هو أستاذ لمحمد رسول الله ﷺ وأخوه تقول يمكن خلف عمر رضي الله عنه، رواية الأولى هي الأصح
٥. المكان الذي كانت تقيم فيه السيدة عائشة رضي الله عنها، رواية تقول بالجدة الشريفة من الحجرة وأخوه تقول بالجدة الشريفة وهو الأصح
٦. قبعة الوحي جبريل عليه السلام حيث جاء من هذا المكان أكثر من مرة
٧. جدار حجرة السيدة عائشة رضي الله عنها الذي بني في زمن النبي ﷺ من اللبن وما زال قائماً كما هو حتى الآن ما عدا سقف والجدار الغربي
٨. جدار فicus الانحلال الذي أنشأه عمر بن عبد العزيز رحمه الله في عهدة الوليد بن عبد الملك حول الحجرة الشريفة
٩. الجدار الذي أنشأه السلطان قبايتي حول جدار عمر بن عبد العزيز من الخارج
١٠. الأعمدة للعدة لجدار السلطان قبايتي وهي التي تحمل المئذنة الخضراء حول الحجرة الشريفة
١١. الشباك الأول من المقصورة الشريفة في الجزء الغربي منها هو أصلاً من الروضة الشريفة
١٢. وأدخل في المقصورة في عهد السلطان الظاهر بيبرس
١٣. أسناد الروضة الشريفة
١٤. هذا الجزء من المسجد النبوي
١٥. بيت السيدة فاطمة الزهراء رضي الله عنها
١٦. معراب داخل بيت السيدة فاطمة رضي الله عنها أنشأه السلطان قبايتي
١٧. معراب التهجد الذي كان يتجهد فيه النبي ﷺ

## المحاولة الرابعة

=====

٣ محاولات فاشلة لسرقة الجسد الشريف انتهت بكوارث على رؤوس مخططيها ومنفذيها..  
٣ محاولات والاغبياء لسه مش عاوزين يبطلوا زى ما حكى العلامة ابو الحسين محمد بن أحمد بن جبير -المتوفى سنة ٦١٤ هـ- فى كتابة "رحلة ابن جبير" فى حديثة عن رحلته الى الاسكندرية سنة ٥٧٨ هـ..  
محاولتين عملهم الحاكم بأمر الله فى اوائل القرن الرابع الهجرى..  
محاولة رتبها والى المغرب النصرانى سنة ٥٥٧ هـ بايعاز من ملوك قشتالة..  
والمحاولة الرابعة اترتبت فى الادرن.. حصلت فى زمن الملك الناصر.. السلطان صلاح الدين والدنيا.. أبو المظفر يوسف بن ايوب رحمة الله عليه..

ابن جبير حكى عن الى شافه فى مصر بعد فشل المحاولة.. هو محضرش الاحداث نفسها.. هو بس شاف المجرمين وهما بيتنفخوا ولما سأل عملوا ايه.. قالوله دول عملوا كذا وكذا وكذا.. اسم واحد ذكر فى معرض حديث ابن جبير خلاى ادور فى كتب تانية غير كتاب ابن جبير نفسه.. اسم انا فاكهه كويس..  
حسام الدين لؤلؤ..

ايوه هو.. الباسم.. محمد سلطان فى فيلم الناصر صلاح الدين.. الجدع الى قال للسلطان ان ابنه اتقتل.. ده فى الفيلم طبعا.. بس الحقيقة مش كده خالص.. الحقيقة كتبها القاضى بهاء الدين بن شدداد فى النوادر السلطانية والمحاسن اليوسفية وكتبها تانى المؤرخ الأمريكى برنارد هاملتون فى كتابه الملك المجذوم وورثته.. وكتب معاها كمان تفاصيل اكثر عن محاولة الشؤم دى..  
تعرفوا مين الى دبر وخطط المحاولة الرابعة دى؟؟

رينو دى شاتيون.. حاكم الكرك.. الى هو جوز الى بالى بالك فى الفيلم نفسه.. المعروف عندنا باسم ارناط..  
واحد من اسفل وأسوأ القادة الى بلتنا بيهم الحملات الصليبية.. كتلة من الكراهية والحقد والغل والغدر تمشى على قدمين.. ده طبعا بخلاف تاريخه الاسود كقاطع طريق طريد وسجين فى اوربا قبل ما ييجى عندنا ويتجوز ستيفانى اميرة الكرك ويبقى هو الحاكم على حسها..  
رينو كان شخص غدار دموى جبان يخشى المواجهات.. كان شجاع بس فى الاغارة على قوافل الحجاج والهجوم على المدن وقتل الاطفال والنسوان.. كان بيهرب دايم من اى مواجهات مباشرة.. المرة الوحيدة الى واجه فيها حد راجل لراجل كده كان فخ نصبه ليه الامير مجد الدين ابن الداية فى سهول الفرات.. ووقع هناك زى الرطل واتحبس فى حلب ١٦ سنة كاملة خرج بعدهم علشان يعاود من تانى سفالاته فى الاغارة على المزارعين والمدنيين وقوافل الحجاج لدرجة ان قاضى القضاة فى الشام سنة ٥٧٨ هـ افنى باسقاط فريضة الحج عن الناس الى مجبره تمر من اى طريق يقع تحت سيطرة رينو لخطورة المرور على حياتهم..  
شفت ابطالهم؟؟

قاطع طريق ولص لا اكثر..

سنة ٥٧٧ هـ كسر رينو المعاهدة الى كانت بين صلاح الدين وبين ملك بيت المقدس بلدوين الرابع.. قطع اشجار غابات الكرك ونخيل العريش ونقلهم على قلعة الحكم فى الكرك.. لم صنايعية المراكب من كل مكان وعمل ٥ سفن حربية كبيرة واكثر من ٢٠ مركب خفيف.. وبعد ما عملهم فككهم ونقل على ظهر الجمال من الكرك الى العقبة.. وعلى ساحل البحر الاحمر راح جاى مجمع السفن تانى ونزلها المية بعد ما دهنها زفت اسود وجهها بالسلاح الثقيل وكل معدات الحرب.. وخذ الطريق من العقبة الى بلد كان اسمها عيذاب "حلايب حاليا".. طبعا كل بلد يعدى عليها فى سكتة كان بينزل يسرق منها الى يقدر عليه ويجرى على المراكب بتاعته تانى.. والمراكب الى كان يقابلها فى الطريق كان بيحرقها ويقتل ركبها بعد ما يستولى على الى فيها.. مش فارق بقى مراكب حجاج من مراكب تجارة.. لحد ما وصل عند عيذاب كان دمر ١٦ مركب وقطع طريق التجارة البحرى الى اليمن وجدة والسودان والحبيشة تماما.. وفضل اسطولة معسكر هناك علشان اى مركب تعدى يسرق منها الى يقدر عليه ويبعد الانظار عن فرقة مشاة نزلت على ساحل جدة بالفعل علشان هدف تانى خالص.. وهو معاهم طبعا..  
وصلت اخبار رينو والى بيعمله فى البحر الاحمر الى صلاح الدين من اول ما كان فى العقبة.. المشكلة ان صلاح الدين وقتها مكانش فى مصر ومكانش عنده اسطول جاهز.. كلف صلاح الدين القائد حسام الدين لؤلؤ بالمهمة دى.. الراجل قام بالمهمة بمنتهى الكفاءة.. بعث الى سلطان الدولة الموحدية فى المغرب يطلب منه العون.. السلطان يعقوب المنصور بعثه مهندسين ومواد خام وسفن جاهزة مبنية علشان يعملوا زيه.. وبالفعل قدر حسام الدين لؤلؤ انه يبني النواه الأولى لأسطول المسلمين فى زمن قياسي..

كده احنا جاهزين.. المشكلة دلوقتى ان قوات رينو متوزعة بين حامية فى مدينة اسمها آيلة "قرب العقبة" وحامية فى عيذاب "حلايب" وجزء من القوات نزل البر بالفعل قرب جده واخذ طريقة الى المدينة.

يعمل ايه لؤلؤ؟؟

يبدأ من العقبة وللا عيذاب وللا يجرى ورا العيال الى نزلت عند جده؟؟

خد بالك انهم مكانوش عارفين نية فرقة المشاة البرية دى.. هما كانوا فكريتهم عاملين اغارة عادية بهدف سرقة قوافل الحجاج زى عوايدهم.. محدش انتبه الى خطتهم الخبيثة الا لما خدوا طريق المدينة بالفعل وكانوا وقتها سبقوا قوات حسام الدين لؤلؤ بمسيرة ٥ ايام كاملة..  
حسام الدين لؤلؤ قسم قواته قسمين..

قسم يتعامل مع الحاميات في آيلة وعيذاب والبحر الاحمر..  
وقسم ثانى مطلوب منه يجرى بسرعة الصواريخ علشان يلحق الفرقة الملعونة الى قربت من مدينة رسول الله..  
القسم الاولانى مش بس حقق انتصارات.. ده بهدل الدنيا.. بس ده موضوع ثانى نبقي نحكيه بعدين علشان منظمش الراجل حقه.. خلينا فى القسم الى لحق قوات رينو قبل ما توصل المدينة بيوم واحد بس..  
خدت بالك من المعجزة الى حصلت مع حسام الدين لؤلؤ؟؟  
تيحى نحسبها بالرياضيات؟؟  
لو عربية طلعت قبلك بساعتين على الصحراوى.. وانت حصلتها قبل اسكندرية ب ١٠ كيلو رغم ان سرعتها كانت عادية مش بطيئة..  
يبقى انت كنت سايق على كام؟؟  
طيب هو الخيل مش ليها سرعة قصوى؟  
هو يعنى خيل حسام الدين اجدع من خيل رينو؟؟ ماهى كلها احصنة؟؟  
صحيح.. كلها احصنة..  
بس فى حصان رينا راضى عن راكبة.. وحصان رينا غضبان على راكبة..  
فى اللحظة دى اعتقد اننا نقدر نقول ان خيل حسام الدين لؤلؤ كانوا جند من جنود الله.. مش الخيل عموما ولا الخيول دى خصوصاً.. انما الخيل دى بالذات فى الموقف ده بالتحديد تحولوا الى جنود لله عزوجل انتهت مهمتهم بتوصيل المراد فى الوقت المطلوب وبعدا اصبحت خيل عادية والله اعلم..  
وادركت قوات حسام الدين لؤلؤ قوات رينو على بعد يوم واحد من المدينة المنورة..  
وكانت مذبحة لرينو ورجالته..  
بالرغم من قوة وضخامة اجساد فرسان الفرق الصليبية.. وبالرغم من احجام سيوفهم ودروعهم المرعبة.. الا ان الشاهد الدائم فى اى مواجهة مباشرة بين جيوش المسلمين والعالم دى هو تفوق المسلمين الدائم فى المواجهات المباشرة او الفردية.. وده مش كلامى.. ده كلام برنارد هاملتون فى كتابه الملك المجذوم وورثته وده مكانش مسلم ولا حاجه.. وكمان كلام اسامة بن منقذ فى الاعتبار..  
التفسير المنطقي هنا هو العقيدة القتالية..  
فرسان المسلمين النصر والهزيمة بالنسباليهم مكسب.. لو انتصروا هيبقوا فازوا بمتاع الدنيا وان ماتوا فى الحرب وانهزموا هيبقى نالوا الخير كله.. فى الحالتين كسبانين احدى الحسنين..  
النصر او الشهادة..  
بينما الطرف الاخر بيفكر فى الفلوس والملك والخمور والنسوان والليالى الحلوة.. يعنى يهيمه اوى يطلع من الحرب حى بجسمه كامل علشان يعيش المجد الى حقيقه.. هو مش مقتنع زيك انه لو مات وهو بيحاول هدم قبر نبيك هيبقى شهيد.. هو جاى علشان يحرق قبر ابن الرب زى ما فهموه فى بلاده.. وقبر ابن الرب تحت سيطرتهم فعليا فى تلك الايام.. يبقى كل الى بيحصل من مهاجمة قوافل الحجاج ومحاولات نبش قبر النبى ده ما هو الا سلطة ومقدمات مش لازم يعنى يدفع عمره علشانها..  
والكلام ده لا ينطبق على المسلمين اجمالاً ولا على المسيحيين اجمالاً.. الكلام ده هو الفرق بين الشخص الى يجارب علشان عقيدة والشخص الى يجارب علشان الدنيا.. واكبر مثال هنا هو حروب الاسترداد فى الاندلس.. النبيل بلايو والفونسو السادس وفرناندو قدروا ينتصروا على جيوش المسلمين لنفس السبب..  
طبعا مش محتاج اقولك ان الحرب لما شدت رينو طلع يجرى لأنه كان استاذ فى الهرب.. حسام الدين خد الاسرى متكثفين زى الفراخ على مصر وسلمهم للملك العادل شقيق صلاح الدين.. الملك العادل كان عاوز يطلق سراحهم وكفاية عليهم كسرة الهزيمة.. دماغى لفت وانا يحاول افهم منطقته بكل الطرق بس فشلت.. صلاح الدين رفض كل محاولات العفو عنهم وامر باعدامهم كلهم قصاد الناس جهارا نهارا علشان مش كل واحد الشيطان يلعب فى دماغه يقوم يغزو مدينة رسول الله.. ده غير ان اى تهاون معاها بعد ما عرفوا الطريق هيخلينا ملطشة وكل يومين نلاقى واحد كان معدى بالصدفة فقالك اما انبش القبر بالمرة..  
عفارم يا ريس.. كده التفكير السليم..  
رينو زوج صحيح.. لكن صلاح الدين قتله بعد كده فى حطين لما وقع اسير نفس القائد الى هرب منه فى الحجاز..  
حسام الدين لؤلؤ..  
سبحان الله.. مكتوبالك يا حسام.. ماذا بينك وبين الله يا اخى!!!  
وهو ده الى شافه وحكى عنه ابن جبير حضرتك..  
ابن جبير حكى انه لما نزل اسكندرية لقي اسرى من الروم داخلين البلد والناس مكتفاهم ومركباهم الجمال بالعكس وحواليهم زفة وفضيحة بالطبول والناس بتحدفهم بالطماطم والبيض والطوب.. ولما سأل عن قصتهم عرف الفضائع الى عملوها والى حكينا عنها اول الكلام..  
الريح الى افسدت محاولات الحاكم بأمر الله والزلبانى الى زلزل قلب ابو الفتوح الحسن بن جعفر بأيتين من سورة التوبة ونور الدين زنكى وحسام الدين لؤلؤ ما هم الا أسباب..  
الحماية الحقيقية من فوق يا فندم..  
مخدتش انت بالك من الثقة والايمان فى قوله "ان الله معنا"  
ومع ذلك برضه كان فى حد ثانى من الغباء انه يجرب حظه فى القرن السابع الهجرى..





## المحاولة الخامسة

=====

المحطة الأخيرة.. او هكذا سوف ستكون ان شاء الله..

آخر محاولات المخابيل لسرقة الجسد الشريف من مرقده..

الحاكم بأمر الله فشل مرتين.. والى المغرب المسيحي المدعوم من العدو التاريخي الأوروبي فشل.. رينو دى شاتيون نجم نجوم مستنقع الحملات الصليبية فشل.. ولسه برضه فى ناس تخيلت انها انصح من الكل ومصممة..

بس المرة دى مش اوروبى ولا نصرانى ولا مدعى الوهية..

المرة دى اخطر من الكل..

الشيعة..

الحادثة دى حصلت سنة ٥٦١ هـ.. هتلاقى ذكرها فى كتاب وفاء الوفا برضه نقلا عن مصدرها الأصيل وهو كتاب الرياض النضرة فى فضائل العشرة للفقبة الشافعى الامام محب الدين ابو العباس الطبرى المولود فى مكة سنة ٦١٥ هـ.

نلاحظ هنا ان المسافة بين ميلاد راوى الأحداث والاحداث نفسها حوالى ٥٠ سنة.. بالنسبة لحدث جلال زى ده نقدر نقول ان القصة لم تموت ولم تنتهى بمجرد انها خلصت.. بمعنى آخر.. فى اسباب قوية لتصديق القصة خصوصا انها غريبة شوية. محب الدين الطبرى محضرش الاحداث دى.. انما نقلها عن واحد اسمه هارون ابن الشيخ عمر بن الزغب.. ده كان رجل صالح مشهود له بحسن السيرة والسمعة.. حكى هارون ان ابوه – الشيخ عمر بن الزغب – كان صديق شخصى للمستول الأول عن المقام النبوى والحجرة الشريفة الشيخ شمس الدين صواب اللمطى.. فى قعدة دردشة بين الشيخ عمر والشيخ صواب اللمطى.. الشيخ صواب حكى الحكاية دى لصديقه وجسمه بيرتعش من مجرد الذكرى.

بيقول الشيخ صواب ان كان له صديق وثيق الصلة بأمر المدينة المنورة - أبو فليته عز الدين القاسم بن مهنا بن الحسين - فى الوقت ده.. صديق بيعرف منه اخبار دار الحكم والاشاعات اياها بتاعة الجماعة السياسيين دول على اعتبار ان اخبارهم دايمًا مادة حلوة للتسلية والضحك على بلاهتهم او التحسر على حماقتهم وخيابتهم.. اذ فجأة فى اليوم ده تتغير الحكاية من التسالى والضحك الى شيء مفزع.

عرف الشيخ صواب ان جماعة من اهل حلب وصلوا اليوم ده فى زيارة خاصة للأمير.. زيارة كان فيها فلوس وجواهر وهدايا بالهبل والحاجات الى بيعيها الجماعة الحكام دول.. والمقابل كان السماح ليهم انهم يفتحوا الحجرة النبوية الشريفة ويخرجوا منها سيدنا ابو بكر وسيدنا عمر بس.. النبى نفسه محدش هيمنه بأذى.. كلمة شرف.. مين يقدر يأذى رسول الله يعنى؟؟

المفزع فى الأمر مش ان حد فكر فى نبش القبر وعرض هدايا والكلام ده كله.. المفزع فى الامر بالنسبة للشيخ صواب هو موافقة الأمير على فتح الحجرة النبوية المعزولة تماما بجدار خماسى بناه الخليفة عمر بن عبد العزيز.. تصميم القبر كده.. ملوش اى مدخل الا هدم الجدار المحيط بيه..

ومين يقدر يهدم حجر ويقلق رقاد الحبيب عليه الصلاة والسلام؟؟

فضل الشيخ صواب مهموم ومش عارف يعمل ايه بعد ما سمع الخبر الشؤم ده.. قعد يفكر ازاى هيفسد عليهم خطتهم.. الزوار شيعة.. ومن اخبث من الشيعة فى شدة كراهيتهم لاهم اتنين من صحابة الرسول.. بالقطع نيتهم مش خير ابدأ.. مجرد فتح الحجرة حتى بدون المساس بجسد الرسول يعتبر مصيبة لوحده.

التدبير من عندك يارب..

بينما الشيخ صواب قاعد فى همومة.. جاله مرسال الامير وقاله النهارده هيجيلك ضيوف عاوزين حاجات من الحجرة الشريفة.. لبي طلباتهم وسبيهم يعملوا ما بدالهم من غير اعتراض.. واحنا عارفين طبعًا الى يعترض على كلام اى امير بيحصله ايه.

مقدرش الشيخ صواب انه يعترض.. بعد صلاة العشاء خرج الناس وفضى المسجد.. قفل الشيخ الابواب.. بعد دقائق خبط الباب.. فتح فلقى الجماعة اياهم.. بيحكى انه عد اربعين راجل داخلين فى ايديهم الفتوس والمعاول والشموع والالت الحفر المختلفة..

الشيخ متجمد مكانه من هول الموقف.. انعقد لسانه عن الكلام وان كنت اظن ان ضربات قلبية قربت من الالف كلها كانت بتستنجد بالله عزوجل وترجوه انه يحمي حبيبه.. اتجه الجماعة اياهم الى الحجرة الشريفة.. وبمجرد ما بلغوا المنبر الى قبلها.. انشقت الارض وبلعتهم كلهم بعدتهم والاتهم في ثواني.. ثواني معدودة ورجع المكان زى ما كان وكأن شيئاً لم يكن.. انشقت الارض وابتلعت الظلمه وقفلت بطنها عليهم تانى.. مفيش اى اثر فى المسجد لأى واحد منهم.. وكأنهم مجوش من الاساس وكأن الارض لم تنشق.. حتى حصير المسجد لم يتبعثر.. حاجه كده لو حضرتها ممكن تقول ان اكيد كنت بحلم.

الجماعة اتأخروا والأمير قلق عليهم.. ضيوفه برضه.. بعث للشيخ صواب يسأله عنهم.. الشيخ حكا له الى حصل بالظبط.. الامير طبعاً مصدقوش وهدهد بضرب عنقه.. ولكن مع ارتجاف جسد الرجل وعدم وجود اى اثر للمعتدين الاربعة مال الامير لتصديق القصة.. اتفق مع الشيخ صواب على كتم الموضوع ده تماماً والا هيضرب عنقه.. ولكن بما ان الحكاية وصلتنا.. يبقى الشيخ صواب لم يلتزم بكلام الأمير. شفت الشيعة يا معلم؟؟

عرفت دلوقتي ليه الشيخ ابو بكر النابلسي قال "لو كان معي عشرة اسهم لرميت تسعة في المغاربة (يقصد الشيعة) وواحد في الروم" العدو معروف.. انت كده كده واخذ حذرك منه.. الادهي والامر من العدو هو الصديق المزيف.. القريب الغادر.. الجار الى انت فاكر انك ممكن تأمنه وان الى بينكوا مجرد خلاف في الرأي.. بينما هو بيخطط لذبك.. الخطر الحقيقي هو من يدعي الاسلام وقلبة مليان بلاوى.. الخطر كل الخطر هو مسلم يدعي انه بينقى التراث او بيحدد الخطاب الديني.. وهو مش بيعمل اى حاجه الا التشكيك في التراث وهدم ثوابت الدين وزرع الشك في النفوس الضعيفة.

نجا الجسد الشريف من محاولة آثمة اخرى.. مش عارف ليه حسيت ان الصديقين في القبر احدهما تسلل القلق الى قلبه خوفا على صديقه لا خوفا من نبش القبر والتمثيل بجثمانه هو شخصياً.. حسيت ان الحبيب المصطفى مد ايده يهدى من روع صديقه وهو بيقوله.. "لا تحزن ان الله معنا".

بينما على مقربة منهم يرقد جسد آخر لو كانوا شافوه – حيا او ميتا - كانوا ماتوا على نفسهم من الرعب.. جسد تحسه بينتفض في رقاده وهو بيقول من اراد ان تثكله امه او تترمل زوجته او ييتم اولاده.. فليقرب هذ المقام الشريف. هل هيظهر تانى حد يفكر في الافكار السوداء دى؟؟

والله اتمنى.. رغم انه بلاء عظيم خصوصا في وجود اعداء الاسلام على رؤوس الامم الاسلامية.. ولكنه في نفس الوقت هيرد كثير من الغافلين لدينهم تانى ويوحد الأمة كلها للدفاع عن سيد الخلق.. وكده كده كلنا ثقة ان حماية نبي الأمة ملهاش اى علاقة بضعف او قوة الامة نفسها.. رب العزة حاميه شاء من شاء وابى ومن ابى.. الامنية على غرابتها وقسوتها الا انه شبه تعنيفك لأبنك وانت بتحبه او اصرارك على انه يخوض التجربة لوحده مع ثقتك التامة انه هيعك بس علشان يتعلم وعوده يشتد.

هو ده الى احنا محتاجينه دلوقتي.. حدث جلل نتلم حواليه لعلنا نقوم من سبات طويل اوى قارب على ال ٥ قرون.. ومفيش حد يلم المشتتين افضل من الحبيب كان حى او ميت عليه الصلاة والسلام.



(تمت)

أحمد حسني

الرياض في مارس ٢٠٢١